

# Up Reisen gohn

## Gebrüder Grimm



e-Books  
E-BOOKS

[sternchenland.com](http://sternchenland.com)

calibre 1.0.0

# Gebrüder Grimm

# Up Reisen gohn

Et was emol ne arme Frau, de hadde enen Suhn, de wull so gerne reisen, do seg de Mohr 'wu kannst du reisen? wi hebt je gar kien Geld, dat du mitniemen kannst.' Do seg de Suhn 'ich will mi gut behelpen, ick will alltied seggen 'nig viel, nig viel, nig viel.'

Do genk he eene gude Tied un sede alltied 'nig viel, nig viel, nig viel.' Kam do bi en Trop Fisker un seg 'Gott helpe ju! nig viel, nig viel, nig viel.' 'Wat segst du, Kerl, nig viel?' Un asse dat Gören (Garn) uttrocken, kregen se auck nig viel Fiske. So met enen Stock up de Jungen, un 'hest du mig nig dresken (dreschen) seihn?' 'Wat sollt ick denn seggen?' seg de Junge. 'Du sollst seggen 'fank vull, fank vull.'

Do geit he wier eene ganze Tied un seg 'fank vull, fank vull,' bis he kümmert an enen Galgen, do hebt se en armen Sünder, den willt se richten. Do seg he 'guden Morgen, fank vull, fank vull.' 'Wat segst du, Kerl, fank vull? sollt der noch mehr leige (leidige, böse) Lüde in de Welt sien? is düt noch nig genog?'

He krig wier wat up den Puckel. 'Wat sollt ick denn seggen?' 'Du sollst seggen 'Gott eröst de arme Seele.'

De Junge geit wier eene ganze Tied un seg 'Gott tröst de arme Seele!' Da kümmert he an en Grawen, do steit en Filler (Schinder), de tüt en Perd af. De Junge seg 'guden Morgen, Gott tröst de arme Seele!' 'Wat segst du, leige Kerl?' un schleit en met sinem Filhacken üm de Ohren, dat he ut den Augen nig seihen kann. 'Wu sollt ick denn seggen?' 'Du sollst seggen 'do ligge du Aas in en Grawen.'

Do geit he und seg alltied 'do ligge du Aas in en Grawen! do ligge du Aas in en Grawen!' Nu kümmert he bi enen Wagen vull Lüde, do seg he 'guden Morgen, do ligge du Aas in en Grawen!' Do föllt de Wagen üm in en Grawen, de Knecht kreg de Pietske un knapt den Jungen, dat he wier to sine Mohr krupen moste. Un he is sien Lewen nig wier up Reisen gohn.